

ZAKON O KLASIFIKACIJI DJELATNOSTI U BRČKO DISTRIKTU BIH

("Službeni glasnik Brčko distrikta BiH", br. 8/2007, 59/2010 i 11/2020)

DIO PRVI - OSNOVNE ODREDBE

Član 1

(Predmet ovog zakona)

Ovim zakonom se utvrđuje pojam klasifikacije djelatnosti u Brčko distriktu BiH (u daljnjem tekstu: KD), značaj i cilj zakona, primjena zakona i donošenje Odluke o klasifikaciji djelatnosti u Brčko distriktu BiH.

Član 2

(Definicija KD)

Klasifikacija djelatnosti je obavezan standard koji se upotrebljava pri evidentiranju, prikupljanju, obradi, analiziranju, publiciranju i iskazivanju podataka po djelatnostima značajnim za praćenje stanja i kretanja na ekonomskom, demografskom i socijalnom području u Brčko distriktu BiH.

DIO DRUGI - OPĆE ODREDBE I DONOŠENJE ODLUKE O KLASIFIKACIJI DJELATNOSTI U BRČKO DISTRIKTU BIH

POGLAVLJE I - OPĆE ODREDBE

Član 3

(Osnova KD)

(1) Klasifikacija djelatnosti se zasniva na Statističkoj nomenklaturi ekonomskih aktivnosti Evropske unije NACE i usporediva je sa međunarodnom klasifikacijom Ujedinjenih naroda.

(2) Klasifikacija djelatnosti se stalno usklađuje sa svim zvaničnim promjenama Statističke nomenklature ekonomskih aktivnosti Evropske unije, a time i s međunarodnom klasifikacijom djelatnosti Ujedinjenih nacija.

Član 4

(Primjena KD)

Klasifikacija djelatnosti se primjenjuje:

- a) u praćenju promjena u ekonomiji i za donošenje mjera ekonomske i socijalne politike;
- b) u službenoj statistici, sistemu informisanja, evidenciji i planiranju razvoja;

- c) u prikupljanju, obradi i objavi podataka prema djelatnostima;
- d) sklapanju ugovora i izvršavanju međunarodnih obaveza;
- e) u naučnoistraživačkom i analitičkom radu;
- f) za upis djelatnosti u statističke, administrativne, sudske i registre posebnih namjena.

POGLAVLJE II - DONOŠENJE ODLUKE O KLASIFIKACIJI DJELATNOSTI BRČKO DISTRIKTA BiH

Član 5

(Donošenje i sastavni dio Odluke o klasifikaciji djelatnosti u Brčko distriktu BiH)

- (1) Odluku o klasifikaciji djelatnosti u Brčko distriktu BiH donosi gradonačelnik Brčko distrikta BiH, na prijedlog nadležnog organa Bosne i Hercegovine koji obavlja poslove statistike za potrebe Brčko distrikta BiH (u daljnjem tekstu: nadležni organ).
- (2) Odluka o klasifikaciji djelatnosti u Brčko distriktu BiH je usklađena s Odlukom o klasifikaciji djelatnosti u BiH koju je donijela Agencija za statistiku BiH.
- (3) Sastavni dio Odluke iz stava 1 ovog člana čine:
 - a) Klasifikacija djelatnosti Brčko distrikta BiH;
 - b) Klasifikacija djelatnosti Brčko distrikta BiH s objašnjenjima.

Član 6

(Usaglašavanje KD)

- (1) Nadležni organ može predlagati razradu klasifikacije na dodatne nivoe.
- (2) Razrada klasifikacije djelatnosti iz stava 1 ovog člana može se vršiti jedanput godišnje.
- (3) Prijedlozi razrade dostavljaju se Agenciji za statistiku BiH do 1. septembra tekuće godine.
- (4) Nadležni organ dužan je usaglasiti prijedlog razrade na dodatne nivoe iz stava 1 ovog člana sa Agencijom za statistiku BiH.

DIO TREĆI - PRIMJENA KD I STATISTIČKI REGISTRI

POGLAVLJE I - PRIMJENA KD

Član 7

(Upotreba KD)

Klasifikacija djelatnosti se upotrebljava za određivanje djelatnosti, odnosno sva razvrstavanja po djelatnostima poslovnih i drugih subjekata i njihovih dijelova za potrebe statistike, različitih službenih i drugih administrativnih zbirki podataka (evidencije, registri, baze podataka i sl.).

Član 8

(Hijerarhijske kategorije klasifikacije djelatnosti)

Hijerarhijske kategorije grupiranja privrednih i drugih subjekata utvrđuju se Odlukom o klasifikaciji djelatnosti Brčko distrikta BiH iz člana 5 ovog zakona.

Član 9

(Razvrstavanje po djelatnostima)

Prema KD razvrstavaju se po djelatnostima:

- a) pravna i fizička lica i njihovi dijelovi koji obavljaju djelatnost u skladu sa zakonskim propisima;
- b) organi vlasti, uprave na nivou države i entiteta;
- c) organi vlasti i uprave na nivou Brčko distrikta BiH.

Član 10

(Nadležni organi za razvrstavanje subjekata po djelatnostima)

Razvrstavanje po djelatnostima subjekata iz člana 9 ovog zakona, u skladu sa KD vrši nadležni organ u skladu sa zakonima i drugim propisima Brčko distrikta BiH i Bosne i Hercegovine.

Član 11

(Nivoi razvrstavanja i razvrstavanje prema pretežnoj djelatnosti)

(1) Subjekti iz člana 9 ovog zakona i njihovi dijelovi razvrstavaju se u hijerarhijske kategorije klasifikacije djelatnosti Brčko distrikta BiH prema djelatnosti koju obavljaju.

(2) Ako poslovni subjekti iz stava 1 ovog člana obavljaju više djelatnosti, razvrstavaju se prema djelatnosti koju pretežno obavljaju.

(3) i (4) *(brisano)*

POGLAVLJE II - STATISTIČKI REGISTRI

Član 12

(Nadležni organ za vođenje statističkih registara)

(1) Nadležni organ vodi statistički registar subjekata iz člana 9 ovog zakona u skladu sa KD.

(2) Metodološke osnove statističkog registra utvrđuje nadležni organ u skladu s međunarodnim standardima i standardima Evropske unije.

Član 13

(Vođenje statističkog registra)

(1) Uz prijavu za registraciju, kao i uz prijavu promjene podataka upisanih u statistički registar, subjekti upisa koji ne podliježu obavezi upisa u sudski registar ili Registar sud dužni su, u skladu s propisima kojim se uređuje oblast registracije poslovnih subjekata, podnijeti nadležnom organu podatke utvrđene metodološkim osnovama statističkog registra.

(2) Za subjekte koji ne podliježu obavezi upisa u sudski registar podatke iz stava 1 ovog člana dostavljaju organi koji vode evidenciju tih podataka.

Član 14

(Obavješćavanje o promjeni podataka u statističkom registru)

(1) Nadležni organ dužan je obavijestiti subjekte iz člana 9 ovog zakona o razvrstavanju po djelatnostima i o promjeni podataka u statističkom registru.

(2) Izuzetno od stava 1 ovog člana, subjektima upisa, koji podliježu obavezi upisa u sudski registar, nadležni organ nije dužan dostavljati posebnu obavijest o razvrstavanju po djelatnostima.

(3) Subjekti upisa u sudski registar kod usklađivanja djelatnosti s Odlukom o klasifikaciji djelatnosti Brčko distrikta BiH oslobađaju se plaćanja sudske takse.

DIO ČETVRTI - PRIJELAZNE I ZAVRŠNE ODREDBE

Član 15

(Objavljivanje Odluke o klasifikaciji djelatnosti u Brčko distriktu BiH)

Odluka o klasifikaciji djelatnosti u Brčko distriktu BiH objavit će se u "Službenom glasniku Brčko distrikta BiH".

Član 16

(Prestanak važenja Zakona o standardnoj klasifikaciji djelatnosti u Brčko distriktu BiH)

Stupanjem na snagu ovog zakona stavlja se van snage Zakon o standardnoj klasifikaciji djelatnosti u Brčko distriktu BiH ("Sl. glasnik Brčko distrikta BiH" brojevi 4/01 i 8/02).

Član 17

(Stupanje na snagu)

Ovaj zakon stupa na snagu osmog dana od dana objavljivanja u "Službenom glasniku Brčko distrikta BiH".

Samostalni član Zakona o izmjeni i dopuni
Zakona o klasifikaciji djelatnosti u Brčko distriktu Bosne i Hercegovine

("Sl. glasnik Brčko distrikta BiH", br. 11/2020)

Član 3

Ovaj zakon stupa na snagu osmog dana od dana objavljivanja u Službenom glasniku Brčko distrikta Bosne i Hercegovine, a početak će se primjenjivati od 1.1.2021. godine.